



ATASSUT

UPA15/148-149-150-1

Siverth K. Heilmann

06.03.2015

Siunnersuut uunga: Inatsisartut Suleriaasiata allanngortinneqarnera.

(Inatsisartut Siulittaasoqarfiat)

Siunnersuut uunga: Naalackersuinikkut sulinermit aningaasatigut tapiissuteqartarneq pillugu Inatsisartut inatsisaata allanngortinneqarneranik Inatsisartut inatsisaat nr. xx, uu. qqqq 2015-imeersoq.

(Partiinut nutaanut tunngaviusumik tapiissuteqartannginneq. Atuuffiit allat pillugit paasissutissiinngikkaanni qinigaanermut tapiissutisisinnaannginneq. Partiit sinnerlugit aningaasartuutinik ilanngaassisinnaaneq)

(Inatsisartut Siulittaasoqarfiat)

Uunga siunnersuut: Inatsisartunut Naalackersuisunullu il.il. ilaasortat aningaasarsiaqartitaanerit il.il. pillugit Inatsisartut inatsisaata allanngortinneqarneranik Inatsisartut inatsisaat nr. xx, uu. qqqq 2015-imeerspoq

(Inatsisartunut ilaasortat il.il. sulinnigiffeqarallarsinnaanerannut il.il. malittarisassanik Inatsisartut aalajangersaanerat)

(Inatsisartut Siulittaasoqarfiat)

Siullermeerinninneq

ATASSUT-mit oqaaseqaatissarput aallarnerlugu Inatsisartut Siulittaasoqarfiat qutsavigissavarput Inatsisartut suleriaasiat, naalackersuinikkut sulinermit aningaasatigut tapiissuteqarneq kiisalu Inatsisartut Naalackersuisunullu ilaasortat aningaasarsiaqartitaanerit pillugu nutarterinissamik siunertaqarlutik annertuumik suliaqarsimmammata.



Inatsisartut Naalakkersuisullu sulinerminni atugaat pitsaasuussapput naleqquttuullutillu aammattaaq suleriaaseq inuiaqatigiinnut paasiuminarlunilu ersarissuussaaq, tutsuiginartuussaaq minnerunngitsumillu qinikkat innuttaasullu akornanni tatigeqatigiinnermik tunngaveqassaaq.

Taamaammat ersarissumik paasiuminartumillu suleriaaseqarnissaaq Inatsisartut qinikkat sakkussatsialariinnartussaangilaat aammali innuttaasut qanoq suleriaaseqartoqarnersoq pisariitsumik paasisinnaallugulu naatsorsuutigisinnaassavaat, taamaammat ATASSUT-mit assut iluarisimaarparput tamat oqartussaaqataanerat aallaavigalugu Inatsisartut suleriaasiat aammalu Inatsisartut Naalakkersuisullu sulinerminni atugassaat inatsisitigut pitsaanerpaamik pissutsinullu atuuttunut naapertuuttumik matumani ilusilersorniarneqarmata.

ATASSUT inuit ataasiakkaat akisussaassutsip ataani sapinngisamik annerpaamik kiffaangissuseqartitaanissaannik assut pingaartitsisuvoq, taamaammat Inatsisartut qinikkat allatigut atuuffeqarsimagunik atuuffimminnik ilisimatitsisarnerat kiffaangissutsimik aallaaveqartinneqaannarnissaa kissaatiginerpaavarput.

Taamaattorli Inatsisartut apeqquserneqarsinnaanginnissaat annerpaamik aamma qulakkeersimaneqartariaqartoq takusinnaavarput, pingaartumik Inatsisartuni ilaasortat namminneq soqutigisamik siuarsarneqarnissaannik sulissuteqalinnginnissaat qulakkeerniagassavaoq pingaaruteqartoq, taamaammallu pisariaqartinneqarsimappat Inatsisartut atuuffimminnik ilisimatsisuussaatitaalissasut, tamanna peqataaffigissallugu ATASSUT-mit piareersimavugut.

Partiinut nutaanut tunngaviusumik tapiissuteqartannginnissamik inassuteqarneq qulequtaannaatigut takullugu assut nakeriallannarpoq, taamaattorli tunngavilersuutigineqartut misissorluarnerisigut nalilersorluarnerisugullu naapertuilluartuussasoq ATASSUT-mit isumaqarpugut.

Nunatsinnimi qinikkat partiimiit partiimut nuuttarnerat aammalu partii aalajangersimasooq sinnerlugu qinikkat qinigaaffiup iluani maanaannakkut partiiminnit avissaariarlutik nutaamik partiiliortarnerat takussaasalermat partiinut tunngaviusumik tapiissutigineqartartut ersarissumik malittarisassaqartinneqarnissaat pisariaqartoq takusinnaavarput, taamaattorli



nalileruminaatsipparput Inatsisartut Siulittaasoqarfiata aaqqiissutissatut matumani siunnersuutigisaa naapertuilluartuunersoq.

Matumani assersuutigalugu qinigaaffik aallartilaaginnartoq nutaamik partiiliortoqariaasaassappat partiip nutaap aningaasatigut tunngavissaaleqisup qinersinissap tullissaata tungaanut aningaasatigut partiitulli pioreersutut toqqammavissaqartitaannginnera partiimut pinngortumut sanngiilliortitsisinnaavoq. Taamaammat partiit nutaat taamatut aallartittut nutaamik qinersisoqarnissaata tungaanut naapertuilluartumik arlaatigut allatut aaqqiivigineqarsinnaanersut nalilersorneqassappat ATASSUT-mit peqataakutsuussaagut.

Qinigaaffiup matuma siuliani Inatsisartut qanoq suleriaaseqassanersut qanorlu suleriaaseqassannginnersut pillugu misilinneqaataavoq, tassami Inatsisartut suleriaasiat naapertorlugu aammalu Naalakkersuinikkut sulinermut aningaasatigut tapiissuteqartarneq pillugu inatsit najoqqutaralugu piumasaqaatit naammassineqartarnissaat naatsorsuutigalugu partiinut tapiissuteqartoqassappat piumasaqaatit naapertorlugit sulisoqarnissaa naatsorsuutigalugu partiinut tapiissuteqartoqartaraluartoq piumasaqaatinik naammassinnikkumangitsoqarnera tamatta eqqaamagunarparput.

Taamaammat partiinut tapiissutit siunertamittut atorneqarnissaat qulakkerersimaneqaqqullugu partiit piumasaqaatinik naammassinninngitsut, pingaartumillu piaaraluneerlutik naammassinninngitsut tapiissutaannik utertitsisoqartalernissaanik aqutissiuusserusunneq ATASSUT-mit tapersersorparput.

Oqaluuserisat ataatsimiititalianut innersuunneqartarneri pillugit allannguiniarneq aammalu ataatsimiititaliat isumaliutissiisummik saqqummiussisussaataasarnerisa atorunnaarsinneqarnissaat sulinerup pitsaassusaanut qaffassaataassamat ATASSUT-mit tunngaviusumik taperserparput, taamaattorli matumani erseqqissaatigissavarput Inatsisartut ataatsimiinnerminni ataatsimiititalianut suliassanngortitsisinnaanerisa minnerulersinneqannginnissaa aamma pingaartipparput.

Naggataatigut ATASSUT-mit noqqaassutigissavarput suleriaatsip nutarterneqarneranut atatillugu ilanngullugu nalilersorneqassasoq Inatsisartuni ilaasortat ataasiakkaat, eqimattakkaat aammalu



imaluunniit partiikkaat § 37 naapertorlugu sukkulluunniit Naalakkersuisunut apeqquteqartarnerannut pitsaassutsimik piumasaqaatit ersarissarneqarnissaat isumannaarneqaaqqullugu.

ATASSUT-mit erseqqissaatigissavarput siunertarinngilluinnaratsigu § 37-ip atorneqartarnera taamatut kaammattuuteqarnitsinni innarlerniannginnatsigu aamma Inatsisartut apeqquteqarsinnaanerannut periarfissat annikillisarnianngilluinnaratsigit, taamaattorli innersuussutigalugu Naalakkersuisuni ilaasortat eqqortumik akissuteqarnissaminnut pisussaaffeqarnerat, apeqqutit eqqortumik akineqarsinnaasariaqarmata apeqqutit pitsaassusaasa Inatsisartut allattoqarfiata ikiuunneratigut qulakkeerneqartalersinnaanerat matumani nalileqqugipput.

Assersuutigalugu Inatsisartuni ilaasortat apeqquteqarsinnaasarput taamaassorinninnermik immaqaluunniit qanoq naatsorsuutiginnissinnaanermik aallaavilinnik, ataasiaannaratalu tusartinneqartarpugut Inatsisartuni ilaasortap aperisup Naalakkersuisumit apeqquteqarfigisaminit akissutisiani naammaginngikkaa, ilimagaarput naammaginninnginnerit taamaattut annikillisarneqarsinnaasut apeqqutit pitsaassusaasa qaffatsinneqarnerisigut.

Eqqaasitsissutigiinnartigumi Inatsisartuni oqaluuserisassatut siunnersuutinik saqqummiussiniaraanni pitsaassuseq qaffasissasoq piumasaqaataavoq, isumaqarpugullu politikkikkut akuliunnertaqanngitsumik apeqqutit allaffissornikkut siunnersorneqarnikkut pitsaassutsimikkut qaffassarneqarsinnaanerat akornutissaqarani iluaqutaaginnassasoq.

Taakkuupput oqaluuserisassanut pingasuusunut Inatsisartut Siulittasasoqarfiannit siunnersuutigineqartunut ataatsimoortumik ATASSUT-mit oqaatigiumasagut, inassutigissavarpullu siunnersuutit aappassaaneerneqartinnagit Inatsisartut Suleriaaseq pillugu Ataatsimiititaliaannut suliassanngortinneqassasut.